

## На Литии, слава и ныне: глас 5

Бар.  
Б.



Вет - хий день - ми младен - ство - вав  
 пло - ти - ю, Ма - те - ри - ю Де - во - ю  
 в цер - ковь при - но - сит - ся, Сво - е - го за - ко - на  
 ис - пол - ня - я о - бе - ща - ни - е. Е - го - же  
 Си - ме - он при - им гла - го - ла - ше:  
 ны - не от - пу - ща - е - ши сми - ром, по гла - го - лу  
 Тво - е - му, ра - ба Тво - е - го: ви - де - ша бо о - чи мо - и  
 спа - се - ни - е Тво - е Свя - тый.

## На литии стихиры самогласны, глас 1. [Анатолиа:]

Ветхий деньми, Иже закон древле в Синаи дал Моисею, / днесь Младенец видится, / и по закону, яко закона Творец, закон исполняя, / во храм приносится, и старцу даётся. / Прием же Сего Симеон праведный, / и обещаний сбытие виде совершаемое, радостно вопиаше: / видеша очи мои, еже от века таинство сокровенное, / напоследок дней сих явльшееся, / свет разоряя неверных языков омрачение, / и славу дая новоизбранну Израилю. / Темже отпусти раба Твоего / от союз сея плоти, / к нестареемому и чудному некончаемому животу, // подавая миру велию милость.

[Иоанна монаха:]

Днесь древле Моисею в Синаи закон подавый, законным повинуется велением, нас ради яко милосерд по нам быв. Ныне Чистый Бог, яко Отроча Свято, ложесна разверз Чистыя, Себе Самому яко Бог приносится, законныя клятвы свободая, и просвещая души наша.

Глас 2. [Андреа Пирра:]

Емуже вышнии служителие с трепетом молятся, долу ныне Симеон вещными руками прием, Бога человеком соединитися проповеда, и Человека небесна Бога видяй, отлучаяся сущих на земли радостно взываше: Иже во тьме сущим невечерний свет открывай, Господи слава Тебе.

[Германово:]

Днесь Симеон на руки Господа славы подьмет, Егоже под мраком перее Моисей виде, на горе Синайстей скрижали дающа ему: Сей есть, Иже во пророцех глаголяй, и закона Творец. Сей есть, Егоже Давид возвещает: Иже всем страшный, имей велию и богатую милость.

Священнаго священная Дева принесе во святилище святителю, простер же руце Симеон прият Сего радуясь, и возопи: ныне отпускаеши раба Твоего, Владыко, по глаголу Твоему, с миром, Господи.

Жиздитель небесе и земли на руках ношашеся, святым Симеоном старцем днесь: той бо Духом Святым глаголаше: ныне свободихся, видех бо Спаса моего.

[Анатолиа:]

Днесь Симеон старец во храм входит, радуясь духом, Законодавца Моисеева, и исполнителя закона на руки восприяти. Он убо мраком и гласом неявленным боговидец сподобися быти, покровенным лицом евреев неверная сердца изобличи: сей же первовечное Слово Отчее воплощенное понесе, и языком откры свет, Крест и Воскресение: и Анна пророчица показася, Спаса Избавителя Израилю проповедаючи. Тому возопиим Христу Богу нашему: Богородицы ради помилуй нас.

*Слава, глас 5.* [Андреа Критскаго:]

Испытайте Писания, / якоже рече во Евангелиих Христос Бóg наш: / в них бо обретаем Того раждаема, / и пеленами повиваема, / в яслех полагаема, / и млеко питаема, / обрезание приёмлюща, / и Симеоном носима, / не мнением, ни привидением, / но истиною миру явльшася. // К Немуже возопиим: превечный Бóже, слава Тебé.

*И ныне, глас тойже.* [Германово:]

Ветхий деньми младенствовав плотию, / Материю Девою в церковь приносится, / Своего закона исполняя обещание. / Егоже Симеон приим глаголаше: / ныне отпускаеши с миром, / по глаголу Твоему, раба Твоего: // видеша бо очи мои спасение Твое Святыи.